

春秋左傳杜注

春秋左傳杜注卷第二十五

華亭姚培謙學

昭公

經二十有三年春王正月叔孫婼如晉謝取○癸丑

叔鞅卒

無傳○叔弓之子輒之弟也子詣嗣為大夫

○晉人執我行人叔孫婼

稱行人讓晉執使人

○晉人圍郊

討子朝也郊周邑圍郊在叔鞅卒前經書後從赴

○夏六月蔡

侯東國卒于楚

無傳未同盟而赴以名

○秋七月莒子庚與來奔

○戊辰吳敗頓胡沈蔡陳許之師于雞父

不書楚楚不戰也雞父楚

地安豐縣南有雞備亭○今江南鳳陽府壽州西南六十里有安豐故城雞備亭又在其城西南

胡子髡沈子逞滅

國雖存君死曰滅獲陳夏鑿大夫死生通曰獲天王居于狄泉敬王辟子

朝也狄泉今洛陽城內犬谷西南池水也時在城外○尹氏立王子至定元年城成周乃遠之城內亦曰翟泉今煙

朝尹氏周世卿也書尹氏立子朝明非周人所欲立○八月乙未地震○冬公如晉

至河有疾乃復

傳二十三年春王正月壬寅朔二師圍郊二師王師晉師也王師不

以告癸卯郊鄆潰河南鞏縣西南有地名鄆中郊鄆二邑皆子朝所得○括地志云鄆城在鞏縣西南五十八里丁

未晉師在平陰王師在澤邑平陰今河陰縣○故城在今河南府孟津東一里王使

告閒子朝敗故閒音閑庚戌還晉師還

○邾人城翼翼邾邑還將自離姑離姑邾邑從離姑則道徑魯之武城○徑音經○離姑在今山

東兖州府費縣

故武城之南

公孫鉏曰魯將御我

鉏魯大夫

欲自武城還循

山而南

至武城而還依山南行不欲過武城

徐鉏邱弱芳地

三子部大夫

曰道下

遇雨將不出是不歸也

謂此山道下溼

遂自離姑

武城

武城人

塞其前

以兵塞其前道○孔疏此所塞之處必有隘道當是已過武城之邑未出武城之竟故得塞其前斷其後而攻取之斷

其後之木而弗殊

○斷丁管反殊絕也

邾師過之乃推而蹶之

○蹶音厥仆也及邾師既過斷木之地乃推斷木而蹶仆於地以絕邾師走路

遂取邾師獲鉏弱地

取邾師不

書非公命

邾人愬于晉晉人來討叔孫婼如晉晉人執之

書曰晉人執我行人叔孫婼言使人也

嫌內外異故重發傳○使去聲

晉人使與邾大夫坐

坐訟曲直

叔孫曰列國之卿當小國

之君固周制也

在禮卿得會伯子男故曰當小國之君

邾又夷也

邾雜有東夷之風

寡

君之命介子服回在

子服回魯大夫為叔孫之介副

請使當之不敢廢

周制故也乃不果坐韓宣子使邾人聚其衆將以

叔孫與之

與邾使執之

叔孫聞之去衆與兵而朝

示欲以身死

士

彌牟謂韓宣子

彌牟士景伯

曰子弗良圖而以叔孫與其

讎叔孫必死之魯亡叔孫必亡邾邾君亡國將焉

歸

時邾君在晉若亡國無所歸將益晉憂

子雖悔之何及所謂盟主討違

命也若皆相執焉用盟主

聽邾眾取叔孫是為諸侯皆得輒相執

乃弗與

使各居一館

分別叔孫子服回欲各聽其辭恐其相教示也

士伯聽其辭而慙諸

宣子乃皆執之

二子辭不屈故士伯想而執之。孔疏魯人實取邾師二子辭不屈者蓋以朝聘征伐過他國必假道乃

行邾不假道是邾亦合責也

士伯御叔孫從者四人過邾館以如吏

欲使邾人見叔孫之屈辱。御謂進引也引叔孫詣於獄也

先歸邾子士伯曰以芻蕘之

難從者之病將館子於都

都別都謂箕也

叔孫旦而立期焉

立待命也從旦至旦為期。期居其反

乃館諸箕舍子服昭伯於他邑

別因之

范

獻子求貨於叔孫使請冠焉

以求冠為辭

取其冠法而與

之兩冠曰盡矣

既送作冠模法又進二冠以與之偽若不解其意

為叔孫故申豐以

貨如晉

欲行貨以免叔孫

叔孫曰見我吾告女所行貨見而

不出

留申豐不使得出欲以貨免

吏人之與叔孫居於箕者請其吠

狗弗與及將歸殺而與之食之示不愛叔孫所館者雖

一日必葺其牆屋葺補治也去之如始至不以當去而有所毀壞

○夏四月乙酉單子取訾劉子取牆人直人三邑屬子朝者

訾在河南鞏縣西南○訾子斯反○有西訾東訾皆在河南府鞏縣六月壬午王子朝入于尹

自京入尹氏之邑癸未尹圉誘劉佗殺之尹圉尹文公也劉佗劉蚘族敬王黨○佗徒河反丙

戌單子從阪道劉子從尹道伐尹單子先至而敗

劉子還單子敗故己丑召伯奭南宮極以成周人成尹二子周卿

士子朝黨奭召莊公庚寅單子劉子樊齊以王如劉辟子朝出居劉子邑○樊齊即

樊頃甲午王子朝入于王城次于左巷近東城秋七月戊

申。鄆羅納諸莊宮

鄆羅周大夫
鄆肸之子

尹辛敗劉師于唐

尹辛尹氏族唐

周地。後漢志洛陽有唐聚在今河南府洛陽縣東

丙辰又敗諸鄆甲子尹辛取西

闡

西闡周地

丙寅攻蒯蒯潰

河南縣西南蒯鄉是也於是敬王居狄泉尹氏立子朝。晉地道記曰河南縣西南有蒯

亭今在洛陽縣西南

○莒子庚輿虐而好劍苟鑄劍必試諸人國人患

之又將叛齊烏存帥國人以逐之

烏存莒大夫

庚輿將出

聞烏存執爰而立於道左懼將止死

爰長丈二而無刃

苑羊

牧之曰君過之

牧之亦莒大夫

烏存以力聞可矣何必以弑

君成名遂來奔齊人納郊公

郊公著邱公之子十四年奔齊

○吳人伐州來。楚遠越帥師。

令尹以疾從戎。故遠越攝其事。

及諸侯之

師奔命救州來。吳人禦諸鍾離。子瑕卒。楚師燿

子瑕即

尹不起所疾也。吳楚之間謂火滅為燿。軍之重主喪亡故其軍人無復氣勢。燿子潛反。

吳公子光曰。諸侯從

於楚者衆。而皆小國也。畏楚而不獲已。是以來。吾

聞之曰。作事威克其愛。雖小必濟。

克勝也。軍事尚威。

胡沈之

君幼而狂。

狂無常。

陳大夫鬻壯而頑。頓與許蔡疾楚政。

楚令尹死。其師燿。帥賤多寵。政令不壹。

帥賤遠越非正卿也。軍多寵人。

政令不壹於越。

七國同役而不同心。

七國楚頓胡沈蔡陳許。

帥賤而不能整。

無大威命。楚可敗也。若分師先以犯胡沈與陳。必

先奔三國敗諸侯之師乃搖心矣諸侯乖亂楚必

大奔請先者去備薄威

示之以不整以誘之

後者敦陳整旅

敦厚也

陳去聲

吳子從之戊辰晦戰于雞父

七月二十九日違兵忌晦戰擊楚所不意

吳子

以罪人三千先犯胡沈與陳

囚徒不習戰以示不整

三國爭之吳

為三軍以繫於後中軍從王

從吳王

光帥右掩餘帥左

掩餘吳王壽夢子

吳之罪人或奔或止三國亂吳師擊之三

國敗獲胡沈之君及陳大夫舍胡沈之囚使奔許

與蔡頓曰吾君死矣師譟而從之三國奔

三國許蔡頓譟素報反

楚師大奔書曰胡子髡沈子逞滅獲陳夏齧君臣

之辭也

國君社稷之主與宗廟共其存亡者故稱滅大夫輕故曰獲獲得也

不言戰楚未陳也

嫌與陳例相涉故重發之

○八月丁酉南宮極震

經書乙未地動魯地也丁酉南宮極震周地亦震也為屋所壓而死

莖弘

謂劉文公曰君其勉之先君之力可濟也

文公劉蚰也先君謂僉之

父獻公也獻公亦欲立子猛未及而卒

周之亡也其三川震

謂幽王時也三川涇渭洛水也地動川岸崩

今西王之大臣亦震天弃之矣

子朝在王城故謂西王

東王必大

克

敬王居狄泉在王城之東故曰東王

○楚大子建之母在鄭

鄭鄭陽也平王娶秦女廢犬子建故母歸其家○鄭古閒反

召吳

人而啓之冬十月甲申吳大子諸樊入鄭

諸樊吳王僚之太子○顧

氏炎武曰諸樊乃王僚之伯父不應太子與之同名且僚子尚幼此必諸樊之太子光正義亦以為傳寫之誤取楚夫人與

其寶器以歸楚司馬遠越追之不及將死衆曰請

遂伐吳以徼之徼要其勝負遠越曰再敗君師死且有

罪此年秋敗於雞父設往復敗為再敗亡君夫人不可以莫之死也乃縊

於遠澁遠澁楚地在今湖廣安陸府京山縣

○公為叔孫故如晉及河有疾而復此年春晉為邾人執叔孫故公如晉謝之

○楚囊瓦為令尹囊瓦子囊之孫子常也代陽句城郢楚用子囊遺言已築郢城矣今畏吳復增脩以自固

沈尹戌曰子常必亡郢苟不能衛城無益也古者

天子守在四夷德及遠○守除下守其皆去聲天子卑守在諸侯政卑損諸

侯守在四鄰

鄰國為之守

諸侯卑守在四竟

我自完

慎其四竟

結其四援

結四鄰之國為援助○援于春反

民狎其野

狎安習也

三務成功

春夏秋三

時之務

民無內憂而又無外懼國焉用城今吳是懼而

城於郢守已小矣卑之不獲能無亡乎

不獲守四竟○欲如諸侯卑之

守在四竟而不可得也

昔梁伯溝其公宮而民潰

在僖十八年

民弃其上

不亡何待夫正其疆場脩其土田險其走集

走集邊竟之壘

壁○場音亦

親其民人明其伍候

使民有部伍相為候望

信其鄰國慎其

官守守其交禮

交接之禮

不僭不貪不懦不耆

懦弱也耆強也○懦乃亂反耆

巨支反○孔疏不僭不貪不耆謂不往侵鄰國也不懦謂不使人侵己也

完其守備以待不虞又何

畏矣。詩曰：無念爾祖，聿脩厥德。詩大雅無念念也。聿述也。義取念祖考則述治其德。

以顯之無亦監乎？若敖蚡冒至于武文。四君皆楚先君之賢者。土不過

同。方百里為一圻。言未滿一圻。慎其四竟，猶不城郢。今土數圻。方千里為圻。

而郢是城，不亦難乎？言守若是難以為安也。為定四年吳入楚傳。

經二十有四年春，王二月丙戌，仲孫纘卒。無傳孟僖子也。纘俱縛。

反。子何忌。嗣為大夫。○姤至自晉。喜得赦歸。故書至。○夏五月乙未朔，日

有食之。○秋八月大雩。○丁酉，杞伯郁釐卒。無傳。同盟。

赴以名。丁酉九月五日。有日無月。釐方之反。○冬，吳滅巢。楚邑也。書滅用大師。巢吳楚間小國。楚取之以為附庸。

葬杞平公。無傳。

傳二十四年春王正月辛丑召簡公南宮嚭以甘

桓公見王子朝

簡公名莊公之子召伯盈也嚭南宮極之子桓公甘平公之子

劉子謂襄弘

曰甘氏又往矣對曰何害同德度義

度謀也言唯同心同德則能謀義子朝不

能於我無害

大誓曰紂有億兆夷人亦有離德

言紂衆億兆夷人有四夷不能同

德終敗亡○尚書孔注夷人謂平人

余有亂臣十人同心同德

武王言我有治臣十人雖少同

心也○今大誓無此語

此周所以興也君其務德無患無人戊午

王子朝入于鄔

緡氏西南有鄔聚言子朝稍強○鄔烏戶反

○晉士彌牟逆叔孫于箕

將禮而歸之

叔孫使梁其躒待

於門內

躒叔孫家臣○躒戶定反

曰余左顧而歎乃殺之

疑士伯來殺已故謀殺之○歎

晉代右顧而笑乃止叔孫見士伯士伯曰寡君以為

盟主之故是以久子久執子以謝邾不腆敝邑之禮將致諸

從者使彌牟逆吾子叔孫受禮而歸二月媾至自

晉尊晉也取媾族所以尊晉媾行人故不言罪己

○三月庚戌晉侯使士景伯涖問周故涖臨也就問子朝敬王知誰曲直

士伯立于乾祭而問於介衆乾祭王城北門介犬也晉人

乃辭王子朝不納其使衆言子朝曲故

○夏五月乙未朔日有食之梓慎曰將水陰勝陽故曰將水

昭子曰旱也日過分而陽猶不克克必甚能無旱

乎過春分陽氣盛時而不勝陰陽將振出故為旱陽不克莫將積聚也陽氣莫然不動乃將積聚

○六月壬申王子朝之師攻瑕及杏皆潰瑕杏皆潰王邑

○鄭伯如晉子大叔相見范獻子獻子曰若王室

何對曰老夫其國家不能恤敢及王室抑人亦有

言曰嫠不恤其緯嫠寡婦也織者常苦緯少寡婦所宜憂而憂宗周之隕

為將及焉恐禍及己今王室實蠢蠢焉蠢蠢動擾貌吾小國懼矣

然大國之憂也吾儕何知焉吾子其早圖之詩曰

錡之罄矣惟壘之恥詩小雅壘大器錡小器常棄於壘者而所受罄盡則壘為無餘故恥之○孔疏錡喻周壘

喻晉言周之微弱相依恃於晉今王室亂矣晉無力以助之是晉之恥也王室之不寧晉之恥也獻

子懼而與宣子圖之宣子韓起乃徵會於諸侯期以明年

為明年會

黃父傳

○秋八月大雩旱也終如叔孫之言

○冬十月癸酉王子朝用成周之寶珪于河禱河求福

成津人得諸河上珪自出陰不佞以溫人南侵不佞敬王大

助敬王南侵子朝拘得玉者取其玉將賣之則為石王定而

獻之不佞獻璧與之東訾喜得玉故與之邑訾縣西南訾城是也

○楚子為舟師以畧吳疆略行也行吳界將侵之沈尹戌曰此行

也楚必亡邑不撫民而勞之吳不動而速之速台也吳

踵楚

躡楚踵跡而疆場無備邑能無亡乎越大夫胥犴勞

王於豫章之汭

汭水曲○場音亦犴音岸

越公子倉歸王乘舟

歸遺也倉

及壽夢帥師從王

壽夢越大夫○夢平聲

王及圍陽而還

圍陽楚地○王歸行及圍

陽倉與壽夢還越也

吳人踵楚而邊人不備遂滅巢及鍾離而

還

鍾離不書告敗畧

沈尹戌曰亡郢之始於此在矣王壹動

而亡二姓之帥

二姓之帥守巢鍾離大夫

幾如是而不及郢詩曰誰

生厲階至今為梗

詩大雅厲惡階道梗病也

其王之謂乎

為定四年吳入郢傳

經二十有五年春叔孫婍如宋○夏叔詣會晉趙

鞅宋樂大心衛北宮喜鄭游吉曹人邾人滕人薛

人小邾人于黃父。○有鸛鵒來巢。

此鳥六居不在魯界故曰來巢非常故書。○鸛

其俱反本又作鸛鵒音欲

○秋七月上辛大雩季辛又雩

季辛下旬之辛也言又重上事

○九月己亥公孫于齊次于陽州

諱奔故曰孫若自孫讓而去位者陽州魯魯竟

上邑未敢直前故次于竟。○今山東兗州府東平州東北有陽州城

齊侯唁公于野井

濟南有野井亭齊侯

來唁公公不敢遠涉故逆之往至野井。○唁音彥。○野井亭今在山東濟南府齊河縣東濟河北岸

○冬十月戊辰叔

孫婁卒

公不與小斂而書曰者公在外非無恩。○子不敢嗣為大夫

○十有一月己未宋

公佐卒于曲棘

陳留外黃縣城中有曲棘里宋地未同盟而赴以名。○曲棘當在今河南開封府杞縣境

○十

有二月齊侯取鄆

取鄆以居公也

傳二十五年春叔孫婁聘于宋桐門右師見之

右師樂大

心居
桐門

語卑宋大夫而賤司城氏

司城樂氏之大宗也
卑賤謂其才德薄

昭子告

其人曰有師其亡乎君子貴其身而後能及人是

以有禮

唯禮可以貴身
貴身故尚禮

今夫子卑其大夫而賤其宗是

賤其身也

賤人亦賤己

能有禮乎無禮必亡

為定十年樂
大心出奔傳

宋公

享昭子賦新宮

逸詩

昭子賦車轄

詩小雅周人思得賢女以配
君子昭子將為季孫迎宋公

女故
賦之

明日宴飲酒樂宋公使昭子右坐

坐宋公右以相
迎言改禮坐

語

相泣也樂祁佐

禮

退而告人曰今茲君與叔孫其

皆死乎吾聞之哀樂

可樂而哀

而樂哀

可哀而樂

皆喪心也心之

精爽是謂魂魄魂魄去之何以能久

為此冬叔孫
宋公卒傳

季公

若之姊為小邾夫人

平子庶姑與公若同母故曰公若姊

生宋元夫人

宋元夫人

平子之外姊

生子以妻季平子昭子如宋聘且逆之

平子人臣而因

鄉逆季氏強橫

公若從

從昭子

謂曹氏勿與魯將逐之

曹氏宋元夫人曹小邾姓

曹氏告公公告樂祁樂祁曰與之如是魯君必出

政在季氏三世矣

文子武子平子

魯君喪政四公矣

宣成襄昭

無民

而能逞其志者未之有也國君是以鎮撫其民詩

曰人之云亡心之憂矣

詩大雅言無人則憂患至

魯君失民矣焉得

逞其志靖以待命猶可動必憂

為下公孫傳

○夏會于黃父謀王室也

王室有子朝亂謀定之

趙簡子令諸侯

之大夫簡子趙鞅輸王粟具戍人曰明年將納王納王於王城子

犬叔見趙簡子簡子問揖讓周旋之禮焉對曰是

儀也非禮也簡子曰敢問何謂禮對曰吉也聞諸

先大夫子產曰夫禮天之經也經者道之常地之義也義者利之

宜民之行也行者人所履○行去聲天地之經而民實則之○天經地義其

實一理故總而言之謂天地之經則天之明日月星辰天之明也因地之性高下剛柔地之性也

生其六氣謂陰陽風雨晦明用其五行金木水火土氣為五味酸鹹辛苦甘

發為五色青黃赤白黑發見也章為五聲宮商角徵羽淫則昏亂民失

其性滋味聲色過則傷性是故為禮以奉之制禮以奉其性為六畜馬牛羊雞犬豕

五牲

麋鹿麇狼兔

三犧

祭天地宗廟三者謂之犧

以奉五味為九文

謂山龍華蟲藻火粉米黼黻

黻也華若草華藻水草火畫火粉米若白米黼若斧黻若兩己相戾傳曰火龍黼黻昭其文也

六采

畫績之事雜用天地四方之色青與白赤

與黑少與黃皆相次謂之六色

五章以奉五色

青與赤謂之文赤與白謂之章白與黑謂之黼黑與青謂之黻五色備謂

之繡集此五章以奉成五色之用

為九歌八風七音六律以奉五聲

解見二十

年為君臣上下以則地義

君臣有尊卑法地有高下

為夫婦外內以

經二物

夫治外婦治內各治其物。物。事也。所以經紀內外之二事。

為父子兄弟姊妹甥

舅昏媾姻亞以象天明

六親和睦以事嚴父若眾星之共辰極也妻父曰昏重昏曰媾壻父曰姻兩壻

相謂曰亞

為政事庸力行務以從四時

在君為政在臣為事民功曰庸治功曰力行其德教務其

時要禮之本也

為刑罰威獄使民畏忌以類其震曜殺戮

雷震

電曜天之威也。聖人作刑戮以象類之。

為溫慈惠和以效天之生殖長育。民

有好惡喜怒哀樂生于六氣。

此六者皆稟陰陽風雨晦明之氣。孔疏民之六志六氣共生。

之非一氣生一志也。

是故審則宜類以制六志。

為禮以制好惡喜怒哀樂六志使不過節。

哀

有哭泣樂有歌舞喜有施舍怒有戰鬪喜生於好。

怒生於惡是故審行信令禍福賞罰以制死生生。

好物也死惡物也好物樂也惡物哀也哀樂不失。

乃能協于天地之性是以長久也。

協和也。

簡子曰甚哉禮

之大也對曰禮上下之紀天地之經緯也。

經緯錯居以相成者。

民之所以生也是以先王尚之故人之能自由直。

以赴禮者謂之成人。大不亦宜乎。

曲直以弼其性。性曲者以禮直之。性直者以

禮曲之

簡子曰：「鞅也，請終身守此言也。」

鞅能守此言，故終免於晉陽之難。

宋

樂大心曰：「我不輸粟我於周為客。」

二王後為賓客

若之何？使

客。晉士伯曰：「自踐土以來，」

踐土在僖二十八年

宋何役之不會。

而何盟之不同？曰：「同恤王室，子焉得辟之？」子奉君

命以會大事，而宋背盟，無乃不可乎？右師不敢對。

受牒而退。

右師樂大心

士伯告簡子曰：「宋右師必亡，奉君

命，以使而欲背盟，以干盟主，無不祥大焉。」

言不善無大此者為

定十年宋樂大心出奔傳

○有鸛鵒來巢。書所無也。師已曰：異哉！吾聞文武

之世，童謠有之。

師已魯大夫。已音紀。

曰：鸛之鵒之。公出辱之。

下言

則公出辱也。

鸛鵒之羽。公在外野，往饋之馬。

饋遺也。

鸛鵒跕跕

公在乾侯。

跕跕跳行貌。跕張于反。

徵褰與襦。

褰褰。襦而朱反。褰苦故反。

鸛鵒之巢

遠哉遙遙，稠父喪勞。宋父以驕。

稠父，昭公死外故喪勞。宋父，定公代立，故以驕。喪去聲。

鸛鵒鸛鵒，往歌來哭。

昭公生出，歌死還哭。

童謠有是，今鸛鵒來

巢，其將及乎。

將及禍也。

○秋，書再雩，旱甚也。

○初，季公鳥娶妻於齊鮑文子，生申。

公鳥，季公亥之兄。平子，鮑叔父。公

鳥死季公亥與公思展與公鳥之臣申夜姑相其

室公亥即公若也展季氏族相治也○夜本作射又音亦及季姒與饗人檀通季姒公鳥妻鮑文子女饗

人食而懼乃使其妾扶已以示秦端之妻秦端魯大夫妻公鳥妹秦姬也

○扶賴乙反曰公若欲使余余不可而扶余又訴於公甫

公甫平子弟曰展與夜姑將要余要劫我以非禮○要平聲秦姬以告公之

公之亦平子弟公之與公甫告平子平子拘展於卞而執夜

姑將殺之公若泣而哀之曰殺是是殺余也將為

之請平子使豎勿內日中不得請有司逆命執夜姑之有司

欲迎受殺生之命公之使速殺之故公若怨平子季郈之雞

鬪

季平子。郈昭伯二家相
近故雞鬪。郈音后

季氏介其雞

搏芥子播其羽也。或曰以膠
沙播之為介雞。介甲也。高

誘注呂氏春秋云
鎧著雞頭是也

郈氏為之金距。平子怒

怒其不
下已

益宮於

郈氏

請郈氏室
以自益

且讓之

讓責也

故郈昭伯亦怨平子。臧昭

伯之從弟會

昭伯臧為子。從
去聲。後從者皆同

為讒於臧氏而逃於季

氏。臧氏執旗。平子怒。拘臧氏老。將禘於襄公。萬者

二人。其眾萬於季氏

禘祭也。萬舞也。於
禮公當三十六人

臧孫曰。此之謂

不能庸先君之廟

不能用禮也。蓋
襄公別立廟

大夫遂怨平子。公若

獻弓於公。為

公為昭公
子務人

且與之出射於外。而謀去季

氏。公為告公。果公賁

果賁皆公為
弟。賁音奔

公果公賁使侍人僚

相告公。公寢。將以戈擊之。乃走。公曰。執之。亦無命。

也。獨言執之無敕。命。相側加反。懼而不出。數月不見。公不怒。又使言。

公執戈以懼之。乃走。又使言。公曰。非小人之所及。

也。謂僚相為小人。公果自言。公以告臧孫。臧孫以難言難。逐告郈

孫。郈孫以可勸。告子家懿伯。子家驪莊公之玄孫。懿伯曰。讒人

以君徼幸。事若不克。君受其名。受惡名。不可為也。舍民

數世。以求克事。不可必也。且政在焉。其難圖也。公

退之。退使去。辭曰。臣與聞命矣。言若洩。臣不獲死。乃館

於公。恐受洩命之罪。故留公宮以自明。叔孫昭子如闕。闕魯邑。公居於長府。

官府名九月戊戌伐季氏殺公之于門遂入之平子登

臺而請曰君不察臣之罪使有司討臣以干戈臣

請待於沂上以察罪弗許魯城南自有沂水平子欲出城待罪也大沂水出蓋縣南至下邳入泗

請囚于費弗許請以五乘亡弗許子家子曰君其

許之政自之出久矣隱民多取食焉隱窮為之徒者

衆矣日入慝作弗可知也慝姦惡也日冥姦人將起叛君助季氏不可知衆怒不

可蓄也季氏蓄而弗治將蕕蕕積也○蕕紆粉反蕕蓄民將生心

生心同求將合與季氏同求叛君者君必悔之弗聽邱孫曰必

殺之公使邱孫逆孟懿子懿子仲孫何忌叔孫氏之司馬驪

戾言於其衆曰若之何莫對衆疑所助又曰我家臣也不

敢知國凡有季氏與無於我孰利皆曰無季氏是

無叔孫氏也驪戾曰然則救諸帥徒以往陷西北

隅以入陷公圍也公徒釋甲執冰而踞言無戰心也冰積丸葦或云積丸是箭筈用其蓋可以取飲

遂逐之逐公徒孟氏使登西北隅以望季氏見叔孫氏

之旌以告孟氏執郈昭伯殺之于南門之西遂伐

公徒子家子曰諸臣僞劫君者而負罪以出君止

使若非君本意者君自可止不出意如之事君也不敢不改意如季平子名公曰

余不忍也不忍委罪諸臣與臧孫如墓謀辭先君且謀所奔遂行已

亥公孫于齊次于陽州齊侯將唁公于平陰公先

至于野井齊侯曰寡人之罪也使有司待于平陰

為近故也齊侯自咎本不勅有司遠詣陽州而欲近會于平陰故令魯侯過共先至野井遠見迎逆自咎以謝公書曰

公孫于齊次于陽州齊侯唁公于野井禮也將求

於人則先下之禮之善物也物事也謂先往至野井齊侯曰自莒

疆以西請致千社二十五家為社千社二萬五千家欲以給公以待君命待君伐季氏之

命寡人將帥敝賦以從執事唯命是聽君之憂寡

人之憂也公喜子家子曰天祿不再天若胙君不

過周公以魯足矣失魯而以千社為臣誰與之立

為齊臣。○言從君之人皆將弃君去矣。

且齊君無信。不如早之晉。弗從。臧昭

伯率從者將盟。載書曰。戮力壹心。好惡同之。信罪

之有無。

信明也。處者有罪從者無罪。

繾綣從公。無通外內。

繾綣不離散。

以公

命示子家子。子家子曰。如此。吾不可以盟。羈也不

佞。不能與二三子同心。而以爲皆有罪。

從者陷君留者逐君皆有罪也。

或欲通外內。且欲去君。

去君。僞負罪出奔。不必繾綣從公。

二三子好亡

而惡定。焉可同也。陷君於難。罪孰大焉。通外內而

去君。君將速入。弗通何爲。而何守焉。乃不與盟。

何必守公。

昭子自闕歸。見平子。平子稽顙曰。子若我何。昭子

曰人誰不死子以逐君威名子孫不忘不亦傷乎

將若子何平子曰苟使意如得改事君所謂生死

而肉骨也昭子從公于齊與公言子家子命適公

館者執之恐從者知叔孫謀公與昭子言於幄內曰將安衆

而納公昭子請歸安衆公徒將殺昭子伏諸道伏兵○孔疏昭子謀歸安衆而後納公則

獨公得入從公伐季氏者不得入故欲殺昭子也左師展告公公使昭子自鑄歸辟伏兵

平子有異志不欲復納公冬十月辛酉昭子齊於其寢使

祝宗祈死戊辰卒平為平子所欺因祈而自殺○齊音齊左師展將以公乘

馬而歸公徒執之展魯大夫欲與公俱輕歸○輕去聲○欲共公單騎而歸也

○壬申尹文公涉于鞏焚東訾弗克

文公子朝黨於鞏縣涉洛水也東訾

敬王邑

○十一月宋元公將為公故如晉請納夢犬子樂即

位於廟己與平公服而相之平公元公父旦召六卿公曰

寡人不佞不能事父兄父兄謂以為二三子憂寡人

之罪也若以羣子之靈獲保首領以歿唯是楸

所以藉幹者楸棺中祭牀也幹骸骨也○楸音駟附請無及先君賢仲幾

對曰君若以社稷之故私降昵宴羣臣弗敢知昵近也降

昵宴謂損親近聲樂飲食之事○昵女乙反若夫宋國之法死生之度先君有

命矣。羣臣以死守之。弗敢失隊。臣之失職。常刑不

赦。臣不忍其死。君命祇辱。言君命必不行祇適也宋公遂行。己亥。

卒于曲棘。為明年梁邱據語起本

○十二月庚辰。齊侯圍鄆。欲取以居公。不書圍。鄆人自服。不成圍。

○初。臧昭伯如晉。臧會竊其寶龜。僂句。僂句。龜所出地名。○僂音旅。

以卜為信與僭。僭吉。僭不信也臧氏老將如晉。問。問昭伯起居會。

請往。代案昭伯問家故。盡對。故事也及內子與母弟叔孫。

則不對。昭伯妻不對。若有他故再三問。不對。歸及郊。會逆問。又

如初。又不對至次於外而察之。皆無之。執而戮之。逸奔。

郈郈魴假使為賈正焉

郈在東平無監縣東南魴假郈邑大夫賈正掌貨物使有常價若市吏。魴音

房賈音嫁。今東平州東四十里有郈城

計於季氏

送計簿於季氏

臧氏使五人以戈楯

伏諸桐汝之間

桐汝里名。櫛食準反

會出逐之反奔執諸季氏

中門之外平子怒曰何故以兵入吾門拘臧氏老

季臧有惡

相怨惡

及昭伯從公平子立臧會

立以為臧氏後

會曰

僂句不余欺也

傳言卜筮之驗善惡由人

○楚子使蘧射城州屈復蒞人焉

還復蒞人於州屈。蒞音加

城邱

皇遷訾人焉

移訾人於邱皇

使熊相祺郭巢季然郭卷

使二大夫為巢

卷築郭也。卷城在南陽葉縣南。祺音梅。相去聲。今河南南陽府葉縣西南有建城故城即卷城也

子大叔聞之曰

楚王將死矣使民不安其土民必憂憂將及王弗

能久矣

為明年楚子居卒傳

經二十有六年春王正月葬宋元公

三月而葬速

○三月

公至自齊居于鄆○夏公圍成

成孟氏邑不書齊師師賤衆少重在公

○秋

公會齊侯莒子邾子杞伯盟于鄆陵

鄆陵地闕○鄆音專

公至

自會居于鄆

無傳

○九月庚申楚子居卒

未同盟而赴以名

○

冬十月天王入于成周

傳言王入在子朝奔後經在前者子朝來告晚

尹氏召伯

毛伯以王子朝奔楚

召伯當言召氏經誤也尹召族奔非一人故言氏書奔在王入下者王入乃告諸侯

傳二十六年春王正月庚申齊侯取鄆

前年已取鄆至是乃發傳者為

公處
鄆起

○葬宋元公如先君禮也

善宋人違命以合禮

○三月公至自齊處于鄆言魯地也

入魯竟故書至猶在外故書地

○夏齊侯將納公命無受魯貨申豐從女賈

豐賈二人皆季

氏家臣女音汝

以幣錦二兩

二丈為一端二端為一兩所謂匹也二兩二匹

縛一如瑱

瑱充耳縛

卷也急卷使如充耳易懷藏○縛直轉反瑱它殿反

適齊師謂子猶之人高齎

齎子猶家臣子猶梁邱據

○齎魚綺反

能貨子猶為高氏後粟五千庾

言若能為我行貨於子猶當為請使得為

高氏後又當致粟五千庚庾十六斗凡八千斛

高齎以錦示子猶子猶欲之齎曰

魯人買之百兩一布以道之不通先入幣財

言魯人買此甚

多布陳之以百兩為數。財猶材也。

子猶受之。言於齊侯曰。羣臣不盡力

於魯君者。非不能事君也。

欲行其說。故先示欲盡力納魯君。

然據有異

焉。

異猶恠也。

宋元公為魯君如晉。卒於曲棘。叔孫昭子求

納其君。無疾而死。不知天之弃魯耶。抑魯君有罪

於鬼神。故及此也。君若待于曲棘。使羣臣從魯君

以卜焉。

卜知可伐否。

若可。師有濟也。君而繼之。茲無敵矣。

若其無成。君無辱焉。齊侯從之。使公子鉏帥師從

公。

鉏齊大夫。

成大夫公孫朝謂平子曰。有都以衛國也。請

我受師。許之。

以成邑禦齊師。

請納質。

恐見疑。質音致。

弗許。曰。信女足

矣告於齊師曰孟氏魯之敝室也敝壞也用成已甚弗

能忍也請息肩于齊公孫朝詐齊師言欲降使來取成齊師圍成成人

伐齊師之飲馬于淄者曰將以厭眾以厭眾心不欲使知已降也淄水出泰山

梁父縣西北入汶○厭於冉反魯成備而後告曰不勝眾告齊言眾不欲降已不能勝師

及齊師戰于炊鼻季氏師距公非公命則不書炊鼻魯地齊子淵捷從洩聲

子聲子魯大夫射之中楯瓦瓦楯脊○射音石楯常允反繇胸汰輈七入者

三寸入楯瓦也胸車輈輈車輈絲過也汰矢激也矢鏃也○胸其俱反一作胸汰他達反聲子射其馬斬鞅

殪殪死也改駕人以爲駸戾也而助之人魯人也駸戾叔孫氏司馬子車

曰齊人也子車即淵捷將擊子車子車射之殪其御曰又

春秋左傳卷之五

昭公

三

齊

之又欲使射餘人

子車曰衆可懼也而不可怒也子囊帶從

野洩叱之

囊帶齊大夫野洩即聲子○叱昌實反

洩曰軍無私怒報乃私也

將亢子

欲以公戰禦之不欲私報其叱

又叱之

子囊復叱之

亦叱之

野洩亦叱也言齊無戰心但相叱

冉豎射陳武子中手

冉豎季氏臣

失弓而罵

武子罵

以告平子

曰有君子白晢鬢鬚眉甚口平子曰必子彊也無

乃亢諸

子彊武子字○鬢之忍反黑也○甚口甚有口辨也

對曰謂之君子何敢亢

之

偽言不敢違季氏

林雍羞爲顏鳴右

下皆魯人羞爲右故下車戰

苑何忌取

其耳

何忌齊大夫不欲殺雍但戮其耳以辱之

顏鳴去之

其右見獲懼而去之

苑子之御曰

視下顧

復欲使苑子擊其足

苑子刺林雍斷其足鑿而乘於他

車以歸鑿二足行。荆芳弗反斷于管反鑿遣政顏鳴三入齊

師呼曰林雍乘言魯人皆致力於季氏不以私怨而相弃。呼乘並去聲

○四月單子如晉告急五月戊午劉人敗王城之

師于尸氏劉人劉蚩之屬王城子朝之徒尸氏在鞏縣西南偃師城。今河南河南府偃師縣西南有新蔡鎮即古尸鄉春秋時

之尸氏也戊辰王城人劉人戰于施谷劉師敗績施谷周地

○秋盟于鄆陵謀納公也齊侯謀

○七月己巳劉子以王出師敗懼而出。孔疏自劉而出庚午次于渠

渠周地。即周陽渠。在今河南府洛陽縣王城人焚劉燒劉子邑丙子王宿于褚氏洛陽縣南

有褚氏亭。褚音煮。後漢志洛陽有褚氏聚今在洛陽縣東丁丑王次于荏谷庚辰王入

于胥靡辛巳王次于滑

崔谷胥靡滑皆周地胥靡滑本鄭邑後漢書孫堅進軍大谷距洛九十里其谷連亘至潁陽縣何進設八關大谷其一也周之崔谷施谷皆其支徑耳胥靡城在偃師縣東南四十里滑即偃師縣南緄氏故城

晉知

躒趙鞅帥師納王使女寬守闕塞

女寬晉大夫闕塞洛陽西南伊闕口也守之備

子朝○女音汝塞素代反○闕塞山在洛陽縣南

○九月楚平王卒令尹子常欲立子西

子西平王之長庶曰

犬子壬弱其母非適也

壬昭王也

王子建實聘之子西長

而好善立長則順建善則治王順國治可不務乎

子西怒曰是亂國而惡君王也

言王子建聘之是章君王之惡

國有外

援不可瀆也

外援秦也瀆慢也

王有適嗣不可亂也敗親速

讎不立壬秦將來討是速讎也亂嗣不祥。我受其名受惡名。賂吾以天下。

吾滋不從也。滋益也。楚國何為必殺令尹。令尹懼，乃立

昭王。

○冬十月丙申，王起師于滑。起發也辛丑，在郊。郊，邑名。遂次

于尸。十一月辛酉，晉師克鞏。知躒趙鞅之師召伯盈逐王子

朝。伯盈本黨子朝，晉師克鞏，知子朝不成更逐之而逆敬王。王子朝及召氏之族、毛伯得

尹氏、國、南宮嚚奉周之典籍以奔楚。尹、召二族皆奔，故稱氏重見尹、國名者為

後還見殺陰忌奔莒以叛。陰忌子朝黨莒周邑召伯逆王于尸，及劉子

單子盟。召伯新還故盟遂軍圍澤，次于隄上。圍澤，隄上皆周地。隄音低。圍澤即東園之

澤今在洛陽縣東境

癸酉王入于成周

成周今洛陽

甲戌盟于襄宮

襄王廟

晉師使成公般戍周而還

般晉大夫○般音班

十二月癸未王

入于莊宮

莊宮在王城

王子朝使告于諸侯曰昔武王克

殷成王靖四方康王息民竝建母弟以蕃屏周亦

曰吾無專享文武之功

不敢專故建母弟

且為後人之迷敗

傾覆而溺入于難則振救之至于夷王王愆于厥

身

夷王厲王父也愆惡疾也○覆音福

諸侯莫不竝走其望以祈王身至

于厲王王心戾虐萬民弗忍居王于囿

不忍害王也厲王之末周人流

王于

諸侯釋位以閒王政

閒猶與也去其位與治王之政事○閒去聲

宣王有志

而後效官

宣王厲王子彘之亂宣王尚少召公虎取而長之效授也

至于幽王天不弔周

王昏不若用愆厥位

幽王宣王子若順也愆失也

攜王奸命諸侯替

之而建王嗣用遷郊廓

攜王幽王少子伯服也王嗣宜曰也幽王后申姜生大子宜臼王幸褒姒生伯服欲立之而殺大子大子奔申申伯與鄆及西戎伐周戰于戲幽王死諸侯廢伯服而立宜臼是為平王東遷郊廓奸音干下同

則是兄弟之能用力於王室也至于惠王天不靖周生頹

禍心施于叔帶惠襄辟難越去王都

惠王平王六世孫頹惠王庶叔也莊十九

年作亂惠王適鄭襄王惠王子叔帶襄王弟傷二十四年叔帶作難襄王處汜施音異

則有晉鄭咸黜不端

黜去也晉文殺叔帶鄭厲殺子頹為王室去不端直之人

以綏定王家則是兄弟之能率

先王之命也在定王六年秦人降妖

定王襄王孫定王六年魯宣八年

曰

周其有頌王亦克能脩其職諸侯服享二世其職

二世謂靈景
頌子斯反

王室其有間王位諸侯不圖而受其亂災

間王位謂子朝也今子朝以為王猛受亂災謂
楚也今子朝以為晉間去聲下間先王同

至于靈王生而有

頌靈王定
王孫

王甚神聖無惡於諸侯靈王景王克終其

世景王靈
王子

今王室亂單旗劉狄剝亂天下壹行不若

單旗穆公也劉狄
劉蚩也壹專也

謂先王何常之有

言先王
無常法

唯余心所命

其誰敢討之帥羣不弔之人

弔至也○弔如字舊丁歷反○傳
氏遜曰好行禍亂不相弔恤之人

以行亂于王室侵欲無厭規求無度貫瀆鬼神

貫瀆

易也○厭平
聲貫古患反

慢弃刑法倍奸齊盟傲狠威儀矯誣先王

晉為不道是攝是贊攝持也贊佐也先王謂景王。很戶懇反。思肆其罔極肆放也。

茲不穀震盪播越竄在荆蠻茲此也此不穀子朝自謂。未有攸底底至也。

所也。底音旨。若我一二兄弟甥舅獎順天法無助狡猾以

從先王之命毋速天罰赦圖不穀赦其憂而圖其難。則所願

也敢盡布其腹心及先王之經而諸侯實深圖之

昔先王之命曰王后無適則擇立長年鈞以德德

鈞以下此所謂先王之經。王不立愛公卿無私古之制也穆

后及大子壽早夭即世在十五年。單劉贊私立少以閒先

王閒錯先王之制。亦唯伯仲叔季圖之伯仲叔季總謂諸侯。閔馬父聞子

朝之辭曰文辭以行禮也子朝于景之命遠晉之

大以專其志無禮甚矣文辭何為傳終王室亂遠去聲

○齊有彗星出齊之分野不書齊不見齊侯使禳之祭以禳除之晏子曰無

益也祇取誣焉誣欺也天道不諂諂疑也。諂本又作慙他刀反不諂不好諂也不貳

其命若之何禳之且天之有彗也以除穢也君無

穢德又何禳焉若德之穢禳之何損詩曰惟此文

王小心翼翼昭事上帝聿懷多福厥德不回以受

方國詩太雅翼翼共也聿惟也回違也言文王德不違天人故四方之國歸往之君無違德方國將

至何患於彗詩曰我無所監夏后及商用亂之故

民卒流亡

逸詩也言追監夏商之亡皆以亂故

若德回亂民將流亡祝史

之爲無能補也公說乃止齊侯與晏子坐于路寢

公歎曰美哉室其誰有此乎

景公自知德不能久有國故歎也

晏子曰

敢問何謂也公曰吾以爲在德

言我以為有德者當能有此室也

對曰

如君之言其陳氏乎陳氏雖無大德而有施於民

豆區釜鐘之數其取之公也薄

謂以公量收施去聲區音甌

其施之

民也厚

謂以私量貸

公厚斂焉陳氏厚施焉民歸之矣詩

曰雖無德與女式歌且舞

詩小雅義取雖無大德要有喜說之心欲歌舞之式用也

陳

氏之施民歌舞之矣後世若少愆陳氏而不亡則

國其國也已公曰善哉是可若何對曰唯禮可以

已之在禮家施不及國民不遷農不移工賈不變

守常業。賈音古。

士不濫

不失職。

官不滔

滔慢也。

大夫不收公利

不作福。

公

曰善哉我不能矣吾今而後知禮之可以爲國也

對曰禮之可以爲國也久矣與天地竝

有天地則禮義興。

君

令臣共父慈子孝兄愛弟敬夫和妻柔姑慈婦聽

禮也君令而不違臣共而不貳父慈而教子孝而

箴

箴諫也。

兄愛而友弟敬而順夫和而義妻柔而正姑

慈而從

從不自專。

婦聽而婉

婉順也。

禮之善物也公曰善哉寡

人今而後聞此禮之上也。○禮者先王之所尊尚對曰先王所稟
於天地以爲其民也是以先王上之也。稟受也

春秋左傳杜注卷第二十五

春秋左傳杜注卷第二十六

華亭姚培謙學

昭公

經二十有七年春公如齊自鄆行公至自齊居于鄆○

夏四月吳弑其君僚僚垂戰民罷又伐楚喪故光乘閒而動禍國以弑罪在僚○淇氏若水曰書吳弑其君僚

則亂賊之罪可得矣案左氏傳弑吳君僚者公子光專諸也而書曰吳者使人考其跡而罪人斯得矣○楚殺其大夫

卻宛無極楚之讒人宛所明知而信近之以取敗亡故書名罪宛○卻去逆反宛於阮反○金氏賢曰子常殺宛何為而稱國以殺君無道以

令其臣致其擅殺大夫而無忌紀綱亡矣是則君之罪也○秋晉士鞅宋樂祁犁衛北宮

喜曹人邾人滕人會于扈○冬十月曹伯午卒無傳未聞

盟而赴
以名

○邾快來奔

無傳快邾命卿也故書

○公如齊

自鄆行

公至自齊

居于鄆

無傳

傳二十七年春公如齊公至自齊處于鄆言在外

也

在外邑故書地

○吳子欲因楚喪而伐之

前年楚平王卒

使公子掩餘公子

燭庸帥師圍潛

二子皆王僚母弟潛楚邑在廬江六縣西南。今江南廬州府霍山縣東北三十里有潛城。

使

延州來季子聘于上國

季子本封延陵後復封州來故曰延州來

遂聘于晉以

觀諸侯

觀彊弱

楚莠尹然工尹麋帥師救潛

二尹楚官然麋其名

左

司馬沈尹戌帥都君子與王馬之屬以濟師

都君子在都邑

之士有復除者。王馬之屬。王之養馬官屬校人也。濟益也。○復音福。○復除謂優復其身。除其徭役也。此人或別有功勞。或曲蒙恩澤。平常免其徭役。事急乃使與吳師遇于窮。○水經注窮水出安豐縣窮谷。即楚與吳師遇處。在今江南鳳陽府霍邱縣西。今

尹子常以舟師及沙汭而還。

沙水名。○水經注汴沙到浚儀而分汴東注沙南流至義城縣

西南入于淮。謂之沙汭。楚東地也。義城故城在今鳳陽府懷遠縣東北。

左尹卻宛。工尹壽帥師至

于潛。吳師不能退。

楚師彊故吳不得退去。

吳公子光曰。此時也。弗

可失也。

欲因其師徒在外。國不堪役。以弑王。

告鱣設諸曰。上國有言曰。不

索何獲。我王嗣也。吾欲求之。

光。吳王諸樊子也。故曰我王嗣。○索所白反。

事若

克季子。雖至。不吾廢也。

至謂聘還。

鱣設諸曰。王可弑也。毋

老子弱。是無若我何。

猶言我無若是何。欲以老弱託光。

光曰。我爾身也。

言我身猶爾身

夏四月，光伏甲於堀室而享王。

堀地為室。堀苦忽反。

王使

甲坐於道，及其門。

坐道邊至光門。

門階戶席皆王親也，夾之

以鉞。羞者獻體，改服於門外。

羞進食也。獻體解衣。鉞音披劍也。

執羞者

坐行而入。

坐行膝行。

執鉞者夾承之。

承執羞者。

及體以相授也。

鉞及進羞。

者體以所食授王。

光偽足疾，入于堀室。

恐難作王黨殺已素辟之。

鱄設諸寘劍

於魚中以進。

金魚炙。

抽劍刺王，鉞交於胸。

交鱄諸胸。

遂弑王，闔

廬以其子為卿。

闔廬光也。以鱄諸子為卿。

季子至，曰：苟先君無廢祀

民人無廢主，社稷有奉，國家無傾，乃吾君也。吾誰

敢怨，哀死事生，以待天命，非我生亂立者從之，光

人之道也

吳自諸樊以下兄弟相傳而不立適是亂由先人起也季子自知力不能討光故云爾

復命哭墓

復使命於僚墓

復位而待

復本位待光命

吳公子掩餘奔徐公子燭庸

奔鍾吾

鍾吾小國○漢志東海郡司吾應劭曰左傳執鍾吾子今江南邳州宿遷縣西北有司吾城

楚師聞吳

亂而還

言聞吳亂明卻宛不取賂而還

○郤宛直而和國人說之

以直事君以和接類

鄢將師為右領

右領官名○鄢於晚反

與費無極比而惡之

惡郤宛○比毗志反

令尹子常賄

而信讒無極譖郤宛焉謂子常曰子惡欲飲子酒

子惡郤宛

又謂子惡令尹欲飲酒於子氏子惡曰我賤人

也不足以辱令尹令尹將必來辱為惠已甚吾無

以酬之若何

酬報

無極曰令尹好甲兵子出之吾擇

焉

擇取以進子常

取五甲五兵曰寘諸門令尹至必觀之而

從以酬之

曰無極辭

及饗曰惟諸門左

張帷陳甲兵其中

無極謂令

尹曰吾幾禍子子惡將爲子不利甲在門矣子必

無往且此役也

此春救潛之役

吳可以得志子惡取賂焉而

還又誤羣帥使退其師曰乘亂不祥吳乘我喪我

乘其亂不亦可乎令尹使視郤氏則有甲焉不往

召鄢將師而告之

告子惡門有甲兵將害已

將師退遂令攻郤氏且

熱之

熱燒也○熱如悅反

子惡聞之遂自殺也國人弗熱令曰

不爇郤氏與之同罪或取一編管焉或取一秉秆

焉

編管苦也秉把也秆稾也○管古顏反秆古但反○或取一片苦或取一把稾言民不肯燒之

國人投之遂弗

爇也令尹炮之

炮燔也

盡滅郤氏之族黨殺陽令終與

其弟完及佗

令終陽句子佗徒河反

與晉陳及其子弟

晉陳楚大夫皆郤氏之黨

晉

陳之族呼於國曰鄢氏費氏自以為王專禍楚國

弱寡王室蒙王與令尹以自利也

蒙欺也呼去聲

令尹盡

信之矣國將如何令尹病之

為下殺無極張本

○秋會于扈令戍周且謀納公也宋衛皆利納公

固請之范獻子取貨於季孫謂司城子梁與北宮

貞子

子梁宋樂祁也貞子衛北宮喜

曰季孫未知其罪而君伐之請囚

請亡於是乎不獲君又弗克而自出也夫豈無備

而能出君乎季氏之復天救之也

復猶安也

休公徒之怒

休息也

而啓叔孫氏之心不然豈其伐人而說甲執冰

以游叔孫氏懼禍之濫而自同於季氏天之道也

魯君守齊三年而無成季氏甚得其民淮夷與之

淮夷魯東夷說他活反

有十年之備有齊楚之援

公雖在齊言齊不致力

有天

贊有民之助有堅守之心有列國之權而弗敢宣

也

宣用也事君如在國

書公行告公至是也

故執以爲難二子皆圖

國者也。而欲納魯君，鞅之願也。請從二子以圍魯。

無成死之。二子懼，皆辭。乃辭小國，而以難復。以難納，白晉君。

○孟懿子陽虎伐鄆。陽虎，季氏家臣，伐鄆欲奪公。欲奪公，鄆使公不得居。鄆人將戰。

子家子曰：「天命不惛久矣。」惛，疑也。言棄君不疑。使君亡者，必此

衆也。言君據鄆衆，以與魯戰，必敗亡。天既禍之，而自福也，不亦難乎？猶

有鬼神，此必敗也。言尚有鬼神以助君，此戰必當敗也。況無鬼神乎？嗚呼！爲無望也。

夫其死於此乎？公使子家子如晉，公徒敗于且知。

且知，近鄆地也。○且子餘反。

○楚卻宛之難，國言未已，進胙者莫不謗令尹。進胙，國中。

祭祀也
謗詛也

沈尹成言於子常曰夫左尹與中廢尹莫知

其罪而子殺之以興謗讟至於今不已

左尹邵宛也中
廢尹陽令終

成也惑之仁者殺人以掩謗猶弗爲也今吾子殺

人以興謗而弗圖不亦異乎夫無極楚之讒人也

民莫不知去朝吳

在十五年

出蔡侯朱

在二十一年

喪大子建殺

連尹奢

在二十一年

屏王之耳目使不聰明不然平王之溫

惠共儉有過成莊無不及焉所以不獲諸侯邇無

極也

邇近也

今又殺三不辜以興大謗

三不辜郤氏
陽氏晉陳氏

幾及子

矣子而不圖將焉用之

○幾
平聲

夫鄢將師矯子之命以

滅三族國之良也而不愆位

在位無愆過

吳新有君

光新立也驢

場日駭。楚國若有大事，子其危哉！知者除讒以自

安也。今子愛讒以自危也，甚矣其惑也。

音赤

子常曰：

是瓦之罪，敢不良圖。九月己未，子常殺費無極與

鄢將師，盡滅其族，以說于國。謗言乃止。

○冬，公如齊，齊侯請饗之。

設饗禮

子家子曰：「朝夕立於

其朝，又何饗焉？其飲酒也。」

此子家料事之詞

乃飲酒，使宰獻

而請安。

比公於大夫也。禮君不敵臣，宴大夫使宰為主獻獻爵也。請安，齊侯請自安，不在坐也。

子仲之子

曰重，為齊侯夫人，曰：「請使重見。」

子仲，魯公子慙也。十二年，謀逐季氏，不能而奔齊，今行飲

酒禮而欲使重見從宴媒也。見音現媒息列反

子家子乃以君出

辟齊夫人

○十二月晉籍秦致諸侯之戍于周魯人辭以難

經所以不書成周籍秦籍談子

經二十有八年春王三月葬曹悼公

無傳六月而葬緩

○公

如晉次于乾侯

乾侯在魏郡斥邱縣晉竟內邑○今直隸廣平府成安縣東南有斥邱故城

○夏四

月丙戌鄭伯寧卒

無傳未同盟而赴以名

○六月葬鄭定公

無傳三月而葬

速○秋七月癸巳滕子寧卒

無傳未同盟而赴以名

○冬葬滕悼

公無傳

傳二十八年春公如晉將如乾侯

齊侯卑公故適晉

子家子

曰有求於人而即其安人孰矜之其造於竟欲使次於竟以

待弗聽使請逆於晉晉人曰天禍魯國君淹恤在

外君亦不使一个辱在寡人一个而即安於甥舅其

亦使逆君言自使齊逆君使公復于竟而後逆之逆著乾侯也言公不能用子家

所以見辱○著直略反

○晉祁勝與鄔臧通室二子祁盈家臣也通室易妻祁盈將執之盈祁午之

子訪於司馬叔游叔游司馬叔侯之子叔游曰鄭書有之惡直

醜正實蕃有徒鄭書古書名也言害正直者實多徒衆無道立矣子懼不免

言世亂詩曰民之多辟無自立辟詩大雅○多辟匹亦反立辟婢亦反姑已

若何姑且也盈曰祁氏私有討國何有焉言討家臣無與國事遂

執之祁勝賂荀躒荀躒為之言於晉侯晉侯執祁

盈以其專戮祁盈之臣曰鈞將皆死鈞同也愁使吾君聞勝

與臧之死也以為快愁發語之音○愁魚覲反○吾君謂祁盈乃殺之夏六月

晉殺祁盈及楊食我楊叔向邑食我叔向子伯石也○食音嗣食我祁盈之黨

也而助亂故殺之遂滅祁氏羊舌氏初叔向欲娶

於申公巫臣氏夏姬女也其母欲娶其黨叔向曰吾母多

而庶鮮吾懲舅氏矣言父多妾媵而庶子鮮少嫌母氏性不曠其母曰子靈之

妻殺三夫子靈巫臣妻夏姬也三夫陳御叔楚襄老及巫臣也時巫臣已死一君陳靈公一子夏徵舒而

亡一國

陳也

兩卿矣

孔寧儀行父

可無懲乎吾聞之甚美必

有甚惡是鄭穆少妃姚子之子子貉之妹也

子貉鄭靈公夷

○貉亡白反

子貉早死無後而天鍾美於是

是夏姬也鍾聚也子貉死在宣四年○此

因鄭靈早天而夏姬美推之為此言

將必以是大有敗也

○孔疏夏姬淫或殺園滅家叔向之母猶謂未

得大敗故言將必以是大有敗也十四年傳稱施邢侯者或

是夏姬之男此殺楊食我又是夏姬之外孫其種類蓋盡矣

生女黥黑

有仍古諸侯也美髮為黥○黥之忍反

而甚美光可以鑑

髮膚光色可以照人

名曰玄妻

以髮黑故

樂正后夔取之

夔舜典樂之君長

生伯封實有

豕心貪惓無饜忿顙無期謂之封豕

顙戾也封大也○惓力耽反

有

窮后羿滅之夔是以不祀

羿篡夏后者

且三代之亡共子

之廢皆是物也

夏以妹喜殷以妲己周以褒姒三代所由亡也共子晉中生以驪姬廢○喜本或作嬉

女何以

為哉夫有尤物足以移人苟非德義則必有禍

尤美也○

言苟不以德義自持則必有禍

叔向懼不敢取平公強使取之生伯石

伯石始生子容之母走謁諸姑

子容母叔向嫂也華妻也姑叔向母

曰長

叔如生男

兄弟之妻相謂如

姑視之及堂聞其聲而還曰是

豺狼之聲也狼子野心非是莫喪羊舌氏矣遂弗

視

○秋晉韓宣子卒魏獻子為政

獻子魏舒

分祁氏之田以

為七縣

七縣鄆祁平陵梗陽塗水馬首孟也

分羊舌氏之田以為三縣

銅鞮平陽

楊氏司馬彌牟為鄔大夫大原鄔縣。今鄔城故址在山西。大原府介休縣東北二十七里。賈

辛為祁大夫大原祁縣。今大原府祁縣東南八里有古祁城。司馬烏為平陵大夫

魏戊為梗楊大夫戊魏舒庶子。梗陽在大原晉陽縣南。平陵亦曰大陵。今文水縣東北二十里有大陵故城。清

源縣南有梗陽城。俱屬大原府。戊音茂。知徐吾為塗水大夫徐吾。知盈孫塗水。大原榆次縣。今塗水故城。

在大原府榆次縣西南二十里。韓固為馬首大夫固韓起孫。馬首故城。在大原府壽陽縣東南。孟丙

為孟大夫大原孟縣。今縣屬大原府。樂霄為銅鞮大夫上黨銅鞮縣。故城在山西沁

州西南。趙朝為平陽大夫朝趙勝曾孫。平陽平陽縣。故城在山西平陽府臨汾縣西南。僚安為

楊氏大夫平陽楊氏縣。平陽府洪洞縣南二里有古楊城。謂賈辛司馬烏為有力

於王室二十二年。辛烏帥師納敬王。烏即司馬督。故舉之。謂知徐吾趙朝韓

固魏戊餘子之不失職能守業者也卿之庶子其四

人者皆受縣而後見於魏子以賢舉也四人司馬彌牟孟子樂霄僚安

也受縣而後見言采衆而舉不以私也○言非素識魏子謂成鱣鱣晉大夫鱣音專吾與戊也縣

人其以我爲黨乎對曰何也戊之爲人也遠不忘

君遠疏也近不偏同不偏同位居利思義不苟得在約思純無濫心有守

心而無淫行雖與之縣不亦可乎昔武王克商光

有天下光大也○行去聲其兄弟之國者十有五人姬姓之

國者四十人皆舉親也夫舉無他唯善所在親疏

一也詩曰唯此文王帝度其心莫其德音其德克

明克明克類克長克君王此大國克順克比比于

文王其德靡悔既受帝祉施于孫子

詩大雅美文王能王
大國受天福施及子

孫○莫亡白
反施以豉反

心能制義曰度

帝度其心

德正應和曰莫

莫然清靜○
其德既正為

政清靜故有所
施為民皆應和

照臨四方曰明勤施無私曰類

施而無私物
得其所無失

類也○
施去聲

教誨不倦曰長

教誨長
人之道

賞慶刑威曰君

作威作福
君之職也

和徧服曰順

唯順故天
下徧服

擇善而從之曰比

比方善事
使相從也

經緯天

地曰文

經緯相錯
故織成文

九德不愆作事無悔

九德上九曰也皆無
愆過則動無悔吝

故襲天祿子孫賴之

襲受也

主之舉也近文德矣所及

其遠哉

舉魏戊等勤施無私也其四人者
擇善而從故曰近文德所及遠也

賈辛將適其縣見於

魏子。魏子曰。辛來。昔叔向適鄭。驪蔑惡惡貌。欲觀叔

向。從使之收器者。從隨也。隨使人應僉俎豆者。而往立於堂下一言

而善。叔向將飲酒。聞之曰。必驪明也。素聞其賢故聞其言而知之。下

執其手以上曰。昔賈大夫惡賈國之大夫惡亦醜也。娶妻而美。三

年不言不笑。御以如臯。為妻御之臯澤。射雉獲之。其妻始笑

而言。賈大夫曰。才之不可以已。我不能射。女遂不

言不笑。夫。今子少不颺。顏貌不揚顯射雉音石。子若無言。吾幾失

子矣。言之不可以已也如是。遂如故。知今女有力

於王室。吾是以舉女。因賈辛有功而後舉之言人不可無能。行乎。敬之哉。毋

墮乃力墮損也。隨許規反。仲尼聞魏子之舉也。以為義曰。近

不失親謂舉魏戌遠不失舉以賢可謂義矣。又聞其命賈

辛也。以為忠先賞王室之功故為忠詩曰。永言配命。自求多福。忠

也。詩大雅。永長也。言能長配天命致多福者唯忠魏子之舉也。義其命也。忠其長

有後於晉國乎

○冬。梗陽人有獄。魏戌不能斷。以獄上上魏子。斷于亂反。其大

宗賂以女樂訟者之大宗。魏子將受之。魏戌謂閭沒女寬

二人。魏子之屬大夫。曰。主以不賄聞於諸侯。若受梗陽人賄。莫

甚焉。吾子必諫。皆許諾。退朝待於庭。魏子朝君退而待於魏子之庭。饋

入召之

召二大夫食

比置三歎既食使坐

更命之令坐比必利反

魏子曰

吾聞諸伯叔諺曰唯食忘憂吾子置食之間三歎

何也同辭而對曰或賜二小人酒不夕食

或他人也言飢甚

饋之始至恐其不足是以歎中置自咎曰豈將軍

食之而有不足是以再歎

魏子中軍帥故謂之將軍○食音嗣

及饋之畢

願以小人腹為君子之心屬厭而已

屬足也言小人之腹飽猶知厭

足君子之心亦宜然屬之王反厭於鹽反

獻子辭梗陽人

傳言魏氏所以興也

經二十有九年春公至自乾侯居于鄆

以乾侯至不齊得見晉侯故

侯使高張來唁公

唁公至晉不見受高張高偃子

○公如晉次于乾侯

復不見受
住乾侯

○夏四月庚子叔詣卒無傳

○秋七月○冬

十月鄆潰

無傳民逃其上
曰潰潰散叛公

傳二十九年春公至自乾侯處于鄆齊侯使高張

來唁公稱主君

比公於大夫

子家子曰齊卑君矣君祇辱

焉

言往事齊
適取辱

公如乾侯

為齊所卑故復
適晉冀見恤

○三月己卯京師殺召伯盈尹氏固及原伯魯之

子

皆子朝黨也稱伯魯子
終不說學○說音悅

尹固之復也

二十六年尹固與子
朝俱奔楚而道還

有婦

人遇之周郊尤之曰處則勸人為禍行則數日而

反是夫也其過三歲乎夏五月庚寅王子趙車入

于鄴以叛陰不佞敗之

趙車子朝之餘也見王殺伯盈等故叛鄴周邑○鄴列勉反

○平子每歲賈馬

賈買也○賈音古

具從者之衣履而歸之

于乾侯公執歸馬者賣之

賣其馬

乃不歸馬衛侯來獻

其乘馬曰啓服

啓服馬名

整而死

隋整死也○整七艷反

公將爲之櫝

爲作棺也

子家子曰從者病矣請以食之乃以帷裏之

禮曰敝帷不弃

爲埋馬也○食音嗣

公賜公衍羔裘使獻龍輔於齊侯

龍輔王名

遂入

羔裘齊侯喜與之陽穀

陽穀齊邑

公衍公爲之生也其母

偕出

出之

公衍先生公爲之母曰相與偕出請相與

偕告

留公衍母使待已共自公

三日公爲生其母先以告公爲爲兄

公私喜於陽穀而思於魯曰務人為比禍也務人六為也始

與公若謀逐季氏且後生而為兄其誣也久矣乃黜之而以

公衍為犬子

○秋龍見于絳郊絳晉國都魏獻子問於蔡墨蔡墨晉大史曰吾

聞之蟲莫知於龍以其不生得也謂之知信乎對

曰人實不知非龍實知言龍無知乃人不知之耳○莫知音智下謂之知實知注無知同○孔疏言龍

可生得非是不生得也故說古有養龍之事以古者畜龍故國有

養龍氏有御龍氏秦御養也獻子曰是二氏者吾亦聞之

而不知其故是何謂也對曰昔有颺叔安颺古國也叔安其君

名。颺。力。謬。反。

有裔子曰董父

裔遠也。立孫之後。為裔。裔以制反。

實甚好龍能求

其耆欲以飲食之龍多歸之乃擾畜龍以服事帝

舜帝賜之姓曰董

擾順也。飲去聲。食音嗣下同。

氏曰豢龍

豢龍官名。官有世功則以官氏

封諸鬴川鬴夷氏其後也

鬴水。上夷。皆董姓。

故帝舜氏世有

畜龍及有夏孔甲擾于有帝

孔甲少康之後九世君也。其德能順於天。

帝賜之

乘龍河漢各二

合為四。乘去聲。

各有雌雄孔甲不能食而

未獲豢龍氏有陶唐氏既衰其後有劉累

陶唐堯所治也。

學擾龍于豢龍氏以事孔甲能飲食之夏后嘉之賜

氏曰御龍

夏后孔甲。

以更承韋之後

更代也。以劉累代彭姓之承韋。累尋遷魯縣。承韋復國。至商而

滅累之後世復承其國為
承韋氏在襄二十四年

龍一雌死潛醢以食夏后

潛藏也藏以為醢明龍不

知夏后饗之既而使求之

求致龍也

懼而遷於魯縣

不能致龍故懼

遷魯縣自取也魯縣今魯陽也○魯陽故城在今河南汝寧府魯山縣西北

范氏其後也

晉范氏也

獻子曰

今何故無之對曰夫物物有其官官脩其方

方法

朝

夕思之一日失職則死及之

失職有罪

失官不食

不食祿

官宿

其業

宿猶安也

其物乃至

設水官脩則龍至

若泯弃之物乃坻伏

泯滅也坻

止也○鬱湮不育

鬱湮也湮塞也育生也○湮音因○孔疏若滅弃所掌之事令職事不脩則其物乃止息而潛伏沉滯壅

塞不復生育以此故不可生而得也

故有五行之官是謂五官實列受氏

姓封為上公

爵上

祀為貴神社稷五祀是尊是奉

五官之君

長能脩其業者死皆配食於五行之神為王者所尊奉

水正曰句芒

正官長也。取木生句曲而有芒角也。其祀重焉。句古侯。

反下同重

火正曰祝融

祝融明貌。其祀犁焉。

金正曰蓐收

秋物摧蓐而可收也。其祀該焉。

○蓐本又作辱

水正曰玄冥

水陰而幽冥其祀脩及熙焉

土正曰后土

土為羣物主故稱后也其

祀句龍焉在家則祀中雷在野則為社。雷力救反

龍水物也水官弃矣故龍不生

得也

不然周易有之

言若不爾周易無緣有龍

在乾三三

乾下乾上乾

之姤

三三

巽下乾上姤乾初九變

曰潛龍勿用

乾初九爻辭

其同人三三

離下乾上同人

乾九二變

曰見龍在田

乾九二爻辭

其大有三三

乾下離上大有乾九五變

曰飛龍

在天

乾九五爻辭

其夬三三

乾下兌上夬乾上九變。夬古快反

曰亢龍有悔

乾上九爻

辭

其坤三三

坤上坤下坤乾六爻皆變

曰見羣龍無首吉

乾用九爻辭

坤之

剝三三

坤下艮上剝坤上六變

曰龍戰于野

坤上六爻辭

若不朝夕見誰

能物之

物謂上六卦所稱龍各不同也今說易者皆以龍喻陽氣如史墨之言則為皆是真龍

獻子曰社稷

五祀誰氏之五官也

問五官之長皆是誰

對曰少皞氏有四叔

少皞金天氏

曰重曰該曰脩曰熙實能金木及水能治其官使重

為句芒

木正

該為蓐收

金正

脩及熙為玄冥

二子相代為水正

世

不失職遂濟窮桑此其三祀也

窮桑少皞之號也四子能治其官使不失職濟成少皞之

功死皆為民所祀窮桑地在魯社○即少皞之虛也

顓頊氏有子曰犂為祝融犂為火正共

工氏有子曰句龍為后土

共工在大皞後神農前以水名官者其子句龍能平水土故死而見祀

此其二祀也后土為社

方答社稷故明言為社

稷田正也

掌播殖也

有烈

山氏之子曰柱為稷

烈山氏神農世諸侯。賈鄭皆以烈山炎帝之號

自夏以上祀

之

祀柱

周弃亦為稷

弃周之始和能播百穀湯既勝夏廢柱而以弃代之

自商以來祀之

傳言蔡墨之博物

○冬晉趙鞅荀寅帥師城汝濱

趙鞅趙武孫也荀寅中行荀吳之子汝濱晉所取陸渾地

○陸渾今河南河南府嵩縣汝水在縣南

遂賦晉國一鼓鐵以鑄刑鼎

今晉國各山功力其鼓石

為鐵計今一鼓而足因軍後而為之故言遂。鼓量名王肅家語注三十斤為鈞鈞四為石石四為鼓蓋用四百八十斤鐵

著范宣

子所為刑書焉仲尼曰晉其亡乎失其度矣夫晉

國將守唐叔之所受法度以經緯其民卿大夫以

序守之

序位次也

民是以能尊其貴貴是以能守其業

孔

其舊法民不預知臨時制宜輕重難測民是以能尊其實畏其威刑也官有正法民常畏威實是以能守其業保祿位也貴賤不愆

所謂度也文公是以作執秩之官為被廬之法僖三十七

年文公蒐被廬脩唐叔之法以為盟主今弃是度也而為刑鼎民在

鼎矣何以尊貴弃禮徵書故不尊貴○弃禮徵書民意全在於鼎與叔向論刑書同意貴何業之

守民不奉上則上失業貴賤無序何以為國且夫宣子之刑夷

之蒐也晉國之亂制也范宣子所用刑乃夷蒐之法也夷蒐在文六年一蒐而三易中軍帥賈季其鄭

之徒遂作亂故曰亂制若之何以為法蔡史墨曰范氏中行氏其

亡乎蔡史墨即蔡墨中行寅為下卿而干上令擅作刑器以

為國法是法姦也又加范氏焉易之亡也范宣子刑書中既廢矣今

復興之是成其咎。○易之亡也。其及趙氏。趙孟與焉。然不得

已。若德可以免。鑄刑鼎本非趙鞅意。不得已而從之。若能脩德。可

經三十年春。王正月。公在乾侯。釋不朝。正于朔。○夏六月庚

辰。晉侯去疾卒。未同盟而赴以名。○秋八月。葬晉頃公。三月而葬。速。

頃音○冬十有二月。吳滅徐。徐子章羽奔楚。徐子稱名。以名告也。

傳三十年春。王正月。公在乾侯。不先書鄆與乾侯。

非公且徵過也。徵明也。二十七年。二十八年。公在鄆。二十九年。公在乾

猶可掩。故不顯書其所在。使若在國。然自是鄆人潰叛。齊晉卑公。子家忠謀。終不能用。內外弃之。非復過誤所當掩塞。故每歲書公所在。○胡傳。公去社。稷於今五年。每歲首月不書公者。在魯四封之內。則無適而非其所也。至是鄆潰。容寄乾侯。非其所矣。歲首必書公之所在者。蓋以存君。不與季氏之專國也。

而罪臣子譏諸侯之意具矣

○夏六月晉頃公卒秋八月葬鄭游吉弔且送葬

魏獻子使士景伯詰之曰悼公之喪子西弔子蟫

送葬

在襄十五年
蟫居表反

今吾子無貳何故

弔葬共使

對曰諸侯所以

歸晉君禮也禮也者小事大大字小之謂事大在

其其時命

隨時共所求

字小在恤其所無以敝邑居大國

之間其其職貢與其備御不虞之患豈忘其命

其不

共命以所備御者多不及辦之

先王之制諸侯之喪士弔大夫送葬唯

嘉好聘享三軍之事於是乎使卿晉之喪事敝邑

之間先君有所助執紼矣

紼執索也禮送葬必執紼。間音開。

若其不聞

雖士大夫有所不獲數矣

不得如先王禮數

大國之惠亦慶

其加

慶善也謂善其君自行

而不討其乏明底其情

底致也。底音旨。

取備

而已以為禮也

孔疏善其有加不討其乏明知鄭國致其情實取充備而已

靈王之喪

在襄二十九年

我先君簡公在楚我先大夫印段實往敝邑之少

卿也

少宰

王吏不討恤所無也今大夫曰女盍從舊

舊有豐有省不知所從從其豐則寡君幼弱是

以不共從其省則吉在此矣唯大夫圖之晉人不

能詰

傳言大叔之敏

○吳子使徐人執掩餘使鍾吾人執燭庸

二十七年奔故

公子奔楚楚子大封而定其徙

大封與土田定其所徙之居

使監馬

尹大心逆吳公子使居養

二子奔楚楚使逆之於竟也養即所封之邑○今河南開封府陳州沈邱

縣東有養城莠尹然左司馬沈尹戌城之

城養取於城父與

胡田以與之

胡田故胡子之地

將以害吳也子西諫曰吳光

新得國而親其民視民如子辛苦同之將用之也

若好吾邊疆使柔服焉猶懼其至

柔服謂不與吳構怨吾又彊

其讎以重怒之無乃不可乎

讎謂二公子

吳周之胄裔也

而弃在海濱不與姬通今而始大比于諸華光又

甚文將自同於先王

先王謂犬王王季亦自西戎始比諸華

不知天將以爲

虐乎使翦喪吳國而封大異姓乎其抑亦將卒以

祚吳乎其終不遠矣

言其事行可知不久

我盍姑億吾鬼神

億安也

而寧吾族姓以待其歸

善惡之歸

將焉用自播揚焉

播揚猶勞勛也

王弗聽吳子怒冬十二月吳子執鍾吾子遂伐徐

防山以水之

防壅山水以灌徐

己卯滅徐徐子章禹斷其髮

斷髮自刑示懼

○斷丁管反

攜其夫人以逆吳子吳子唁而送之使

其邇臣從之遂奔楚

邇近也

楚沈尹戌帥師救徐弗及

遂城夷使徐子處之

夷城父也

吳子問於伍員曰初而言

伐楚

在二十

余知其可也。而恐其使余往也。又惡人之

有余之功也。今余將自有之矣。伐楚何如。對曰。楚

執政衆而乖。莫適任患。若爲三師以肄焉。

肄猶勞也。適音的。

任音

一師至。彼必皆出。彼出則歸。彼歸則出。楚必道

敝。

罷敝於道。

亟肄以罷之。

亟數也。亟其冀反罷音皮。

多方以誤之。既罷而

後以三軍繼之。必大克之。闔廬從之。楚於是乎始

病。

爲定四年吳入楚傳。

經三十有一年春。王正月。公在乾侯。○季孫意如

會晉荀躒于適歷。

適歷晉地。躒音歷。適音的。

○夏四月丁巳。薛伯

穀卒

襄二十五年盟重邱

○晉侯使荀躒唁公于乾侯

將使意如迎公故荀躒來

唁

○秋葬薛獻公

無傳

○冬黑肱以濫來奔

黑肱邾大夫濫東海昌慮

縣不書邾史闕文。今昌慮故城在山東兗州府滕縣東南

○十有二月辛亥朔日有食

之

傳三十一年春王正月公在乾侯言不能外內也

公內不容於臣子外不容於齊晉所以久在乾侯。王氏錫爵曰左氏不知春秋存君之義

○晉侯將以師納公范獻子曰若召季孫而不來

則信不臣矣然後伐之若何晉人召季孫獻子使

私焉曰子必來我受其無咎

言我為子受無咎之任

季孫意如會

晉荀躒于適歷荀躒曰寡君使躒謂吾子何故出

君有君不事周有常刑子其圖之季孫練冠麻衣

跣行示憂感○伏而對曰事君臣之所不得也敢逃

刑命言願事君君不肯還不致辟罪君若以臣為有罪請囚于費以待

君之察也亦唯君若以先臣之故不絕季氏而賜

之死雖賜以死若弗殺弗亡君之惠也死且不朽若

得從君而歸則固臣之願也敢有異心君皆謂魯侯也蓋季孫探言罪

已輕重以夏四月季孫從知伯如乾侯知伯荀躒子家

子曰君與之歸一慙之不忍而終身慙乎公曰諾

衆曰。在一言矣。君必逐之。

言晉既憂君。君一言使晉。晉必逐之。

荀躒以晉

侯之命。唁公。且曰。寡君使躒以君命討於意。如意

如不敢逃死。君其入也。公曰。君惠顧先君之好。施

及亡人。將使歸糞。除宗祧。以事君。則不能見夫人。

己所能見夫人者。有如河。

夫人謂季孫也。言若見季孫。已當受禍。明如河以自誓。○施以鼓反。

荀

躒掩耳而走。

怪公所言。示不忍聽。

曰。寡君其罪之恐。敢與知魯

國之難。

言恐獲不納君之罪。今納而不入。何敢復知耶。○難去聲。

臣請復於寡君。退而謂

季孫。君怒未怠。子姑歸祭。

歸攝君事。

子家子曰。君以一乘

入于魯師。季孫必與君歸。公欲從之。衆從者脅公。

不得歸

傳言君弱不得復自在

○薛伯穀卒同盟故書

謂書名也入春秋來薛始書名故發傳經在蒍躒唁公上傳在下者欲魯事相次

○秋吳人侵楚伐夷侵潛六

皆楚邑○夷在今亳州故潛城六城在今壽州俱屬江南鳳陽

楚沈尹戌帥師救潛吳師還楚師遷潛於南岡

而還吳師圍弦左司馬戌右司馬稽帥師救弦及

豫章

左司馬沈尹戌

吳師還始用子胥之謀也

謀在前年

○冬邾黑肱以濫來奔賤而書名重地故也

黑肱非命卿故

曰賤君子曰名之不可不慎也如是

是黑肱也

夫有所有名

而不如其已

有所謂有地也言雖有名不如無名已止也

以地叛雖賤必書地

以名其人終為不義弗可滅已是故君子動則思

禮行則思義不為利回回正心也。為去聲下同。不為義疚疚病也。見義則為之。

或求名而不得或欲蓋而名章懲不義也齊豹為

衛司寇守嗣大夫守先人嗣言其尊作而不義其書為盜求名而不

得也三十年豹殺衛侯兄欲求不畏強禦之名邾庶其在襄二十一年莒牟夷在五邾黑肱以

土地出求食而已不求其名賤而必書春秋叛者多唯取三人來適魯

者三人皆小國大夫故曰賤此二物者所以懲肆而去貪也物事也肆放也。豹書盜

懲肆也三叛人名去貪也若艱難其身身為艱難以險危大人大人在位者而有名

章徹謂勇攻難攻猶作也奔走猶赴趣也士將奔走之若竊邑叛君

以徼大利而無名

謂不書其人名

貪冒之民將實力焉

盡力為之而不顧

於見書

是以春秋書齊豹曰盜三叛人名以懲不義數

惡無禮其善志也

無禮惡道皆數而不忘記

故曰春秋之稱

○稱尺證反

微而顯

文微而義著

婉而辨

辭婉而旨別○辭雖婉順相似而旨意有殊

上之人

能使昭明

上之人謂在位者能行其法非賤人所能

善人勸焉淫人懼焉是

以君子貴之

○十二月辛亥朔日有食之是夜也趙簡子夢童

子羸而轉以歌

轉宛轉也○羸力果反

旦占諸史墨曰吾夢如是

今而日食何也

簡子夢適與日食會謂谷在己故問之

對曰六年及此月也

吳其入郢乎終亦弗克

史墨知夢非日食之應故釋日食之咎而不釋其夢

入郢必以

庚辰

庚辰日有變日在辰尾故曰以庚辰定四年十一月庚辰吳入郢

日月在辰尾

辰尾龍尾也周十二月今之十

月日月合朔於辰尾而食

庚午之日日始有謫火勝金故弗克

謫變氣也庚午

十月十九日去辛亥朔四十一日雖食在辛亥更以始變為占也午南方楚之位也午火庚金也日以庚午有變故災在楚楚之仇敵唯吳故知入郢必吳火勝金者金為火妃食在辛亥亥水也水數六故六年也

經三十有二年春王正月公在乾侯取闕

無傳公別居乾侯遣人誘

闕而取之不用師徒闕口暫反

○夏吳伐越○秋七月○冬仲孫何

忌會晉韓不信齊高張宋仲幾衛世叔申鄭國參

曹人莒人薛人杞人小邾人城成周

世叔申世叔孫也國參子產之子不書

盟時公在外未及告公公已薨○十有二月己未公薨于乾侯十五

傳三十二年春王正月公在乾侯言不遠外內又

不能用其人也其人謂子家驕也言公不能用其人故於今猶在乾侯

○夏吳伐越始用師於越也自此之前雖疆事小爭未嘗用大兵史墨曰

不及四十年越其有吳乎存亡之數不過三紀歲星三周三十六歲故曰不及四十年哀二十二年

越滅吳至此三十八歲越得歲而吳伐之必受其凶此年歲在星紀星紀吳越之分也歲星所

在其國有福吳先用兵故反受其殃○孔疏吳越同分而云越福吳凶者以吳先用兵故反受其殃也

○秋八月王使富辛與石張如晉請城成周子朝之亂其餘

黨多在王城敬王畏之徙都成周成周狹小故請城之天子曰天降禍于周俾我兄弟

竝有亂心以爲伯父憂

俾使也兄弟謂子朝也伯父謂晉侯

我一二親昵

甥舅不皇啓處於今十年

謂二十三年二師圍郊至於今○昵女乙反

勤戍五

年

謂二十八年晉籍秦致諸侯之戍至於今

余一人無日忘之

念諸侯勞

閔閔焉如農

夫之望歲懼以待時

閔閔憂貌王憂亂常閔閔冀望安定如農夫之憂饑冀望來歲之將熟

伯父

若肆大惠復二文之業弛周室之憂

肆展放也二文謂文侯佚文公重耳弛猶

解也○弛式氏反

徼文武之福以固盟主宣昭令名則余一

人有大願矣昔成王合諸侯城成周以爲東都崇

文德焉

作成周遷殷民以爲京師之東都所以崇文王之德

今我欲徼福假靈于成王

脩成周之城俾成人無勤諸侯用寧螫賊遠屏晉

之力也。○發賊喻災害。○發亡候反。其委諸伯父，使伯父實重圖之，俾

我一人無徵怨于百姓。○徵召也。而伯父有榮施，先王庸

之。○庸功也。先王之靈以為大功。○施去聲。范獻子謂魏獻子曰：與其戍周，不

如城之。天子實云。○云欲罷戍而城。雖有後事，晉勿與知可也。

從王命以紓諸侯，晉國無憂，是之不務，而又焉從

事。○紓音舒。魏獻子曰：善。使伯音對。○伯音韓不信。曰：天子有命，敢

不奉承，以奔告於諸侯，遲速衰序。○衰差也。序次也。○衰初危反。於是

焉在。○在周所命。○言或緩或急之等差次序，無不惟周所命。冬十一月，晉魏舒韓不信

如京師，合諸侯之大夫于狄泉，尋盟，且令城成周。

尋平印盟魏子南面居君位衛彪僂曰魏子必有大咎千位以

令大事非其任也彪僂衛大夫詩曰敬天之怒不敢戲

豫敬天之渝不敢馳驅詩大雅戒王者言當敬畏天之譴怒不可遊戲逸豫驅馳自恣渝變也况

敢千位以作大事乎己丑士彌牟營成周計丈數

計所當城之丈數也揣高卑度高曰揣揣初委反度厚薄度深曰仞仞而慎反物

土方議遠適物相也相取土之方面遠近之宜量事期知事幾時畢計徒庸知用幾人功

慮材用知費幾材用書餼糧知用幾糧食以令役於諸侯屬役賦

丈付所當城尺丈屬之欲反屬役謂屬聚下役也令諸國各出若干役築若干丈書以授帥帥諸侯大夫而效

諸劉子效致也韓簡子臨之以為成命臨履其事以命諸侯經所以不書魏舒

○十二月公疾徧賜大夫從公者大夫不受賜子家子

雙琥

琥玉器。刻玉為虎形。

一環一璧輕服

細好之服

受之大夫皆受其

賜己未公薨子家子反賜於府人曰吾不敢逆君

命也大夫皆反其賜書曰公薨于乾侯言失其所

也

不薨路寢為失所

趙簡子問於史墨曰季氏出其君而民

服焉諸侯與之君死於外而莫之或罪也對曰物

生有兩有三有五有陪貳故天有三辰

謂有三

地有五

行

謂有

體有左右

謂有

各有妃耦

謂陪貳妃音配

王有公諸侯

有卿皆有貳也天生季氏以貳魯侯為日久矣民

之服焉。不亦宜乎。魯君世從其失。季氏世脩其勤。

民忘君矣。雖死於外。其誰矜之。社稷無常奉。奉之無常。人言。

唯德也。○從子用反。君臣無常位。自古以然。史墨跡古。今以實言。故詩曰。高

岸為谷。深谷為陵。詩小雅言高。下有變易。三后之姓。於今為庶。主

所知也。三后虞夏商。在易卦。雷乘乾曰大壯。三三。乾下震上。大壯震在乾上。

故曰雷乘乾。天之道也。乾為天子。震為諸侯。而在乾上。君臣易位。猶臣大強壯。若天上有雷。昔成季友桓

之季也。文姜之愛子也。始震而卜。卜人謁之曰。生

有嘉聞。嘉名聞於世。○聞音問。其名曰友。為公室輔。及生。如卜人

之言。有文在其手。曰友。遂以名之。既而有大功於

魯公立僖

受費以爲上卿。至於文子武子。

文子行父。武子宿。

世增

其業。不廢舊績。魯文公薨。而東門遂殺適立庶。魯

君於是乎失國。

失國權

政在季氏。於此君也。四公矣。民

不知君。何以得國。是以爲君。慎器與名。不可以假

人。

器車服。名爵號。

春秋左傳杜注卷第二十六